

四库全书总目

欽定四庫全書總目卷七十七

史部三十三

地理類存目六

大滌洞天記三卷 浙江汪汝霖家藏本

舊本題元鄧牧撰 案牧以宋人入元不仕而卒據陶潛書旨核其書即牧所撰洞霄圖志內宮觀山水洞府古蹟碑記五

門而刪其人物每門又頗有刊削不皆全文卷首吳全節沈多福二序亦同惟增入洪武三十一年正一嗣教真

人張宇初一序稱今年春某宮道士某持宮志請序將廣於梓蓋明初道流重刻時妄以其意刪節之而改其名

也

西嶽神祠事錄七卷 兩淮鹽政採進本

明孫仁編仁貴池人景泰辛未進士官至戶部右侍郎是書乃其官西安府知府時作以記西嶽神祠之事所錄

文章具載首尾年月撰人姓名較張維新華嶽全集所載頗為完整有體其中延熹華山廟碑一篇則剝泐已甚

非復洪氏隸釋之舊矣

石湖志略一卷文略一卷 浙江范懋柱家天一閣藏本

明盧襄撰襄字師陳吳縣人嘉靖癸未進士官至兵部職方司郎中石湖在蘇州府城西南宋范成大為執政時

有別墅在湖上孝宗御書石湖二字以賜其名始顯盧氏世居於此襄乃述其山川古蹟為志略又集諸人題咏

為文略然此書為范氏別業而作自應以是一地為主與州郡輿記為例各殊襄乃兼及人物多至二十有一人

匪獨詞涉夸張抑亦體傷汜濫矣

石鼓書院志四卷 浙江范懋柱家天一閣藏本

明周詔撰案是時有二周詔一為延津人嘉靖庚戌進士見太學題名碑一即此周詔號臺山富順人嘉靖癸巳

官衡州府知府石鼓書院在衡州府治北石鼓山宋景祐開允集賢校理劉沆之請賜額置田與睢陽獄麓白鹿號為四大書院講學家喜稱道之詔官於衡州因勦取舊志稍增損以為此編首地理次室宇次人物次祠翰而附錄文移於末潦草漏略殊無義例蓋書帕本也

淨慈寺志十卷

浙江巡撫採進本

明釋大壑撰大壑字元津杭州淨慈寺僧案淨慈寺在杭州城西南屏山舊無志大壑始創修之其書分形勝建置法嗣檀護著述僧制靈異七門自序稱斷碣磨崖冥搜必錄蓋二十載而始成其用力亦勤矣

徑山集三卷

浙江巡撫採進本

明釋宗淨撰宗淨始末未詳徑山在臨安縣天目山東北唐代宗時僧法欽始造寺是書上卷記寺之建置中卷記禪宗下卷載藝文原刻校讎不精僧方一序謂其魯魚亥豕疊出為白壁蠅玷云

白鷺洲書院志二卷

浙江汪啟淑家藏本

明甘雨撰雨有古今韻分註撮要已著錄初宋淳祐辛丑江萬里知吉州建書院於白鷺洲洲在二水之中故借李白詩二水中分白鷺洲句以名之非金陵之白鷺洲也時宋理宗方重道學為賜額立山長嗣後遂相承為古蹟萬歷辛卯黃梅汪可受為吉安府知府又重修之雨因撰是志分沿革建置教職祀典儲贍名宦人物公移賢勞義助紀述書籍生祠記十三門生祠記者即可受生祠也至別立為一門此其作志之意不在書院矣

歷代山陵考一卷

兩淮馬裕家藏本

明王在晉撰在晉字明初太倉人萬歷壬辰進士官至兵部尚書事蹟附見明史王洽傳是書僅從一統志鈔撮而成無所考證况既名山陵而趙宣子子嘗君輩遺冢亦列其間尤非體也

方廣巖志四卷

江西巡撫採進本

明謝肇淛撰肇淛有史鱗已著錄方廣巖在永福縣東宋給事中黃非熊嘗讀書山中作十咏以紀其勝肇淛時

爲工部郎奉使過家遊於是巖因輯此志則爲義例一條作本紀以志方廣作外紀以志旁近巖壑作別紀以志方外作文紀詩紀以輯前人之作然本紀之名史家以載帝王事跡用之山水殊乖體例別紀信志寧之託生三元德涵之麗刑地獄佛氏之說儒者所不道詩紀未有國朝人所作則雍正中江續重修是書所附入也

石鼓書院志二卷

兩淮馬裕家藏本

明李安仁撰安仁字裕居遷安人萬歷中官衡州府知府是編因周詔舊志重修分上下部上部紀地理室宇人

物名宦下部載藝文採據較詔志爲詳

關中陵墓志二卷

兩淮鹽政採進本

明祁光宗撰光宗後更名伯裕滑縣人萬歷戊戌進士官至兵部尙書是編乃光宗督學陝西時於歷代陵墓詳加考證各爲之圖而系之以說其距諸州縣城方隅道里皆備志之亦自覽聖賢冢墓記之流也

金陵梵刹志五十三卷

編修汪如藻家藏本

明葛寅亮撰寅亮有四書湖南講已著錄是書志金陵梵刹依僧錄分攝以靈谷天界報恩三天寺統次大寺五中寺三十有二小寺百有二十其餘廢寺別爲一編卷首冠以御製欽錄二集御製者太祖之詩文欽錄者沿革之案牘也末附以南藏目錄及諸經租額公費僧規公產諸條例其餘皆略如志乘之體編次頗傷蕪雜

徑山志十四卷

浙江巡撫採進本

明宋奎光撰奎光字培巖萬歷壬子舉人官餘杭縣教諭是編蓋增補宗淨舊志而成分開山諸祖及制教詩文名勝古蹟土產諸門殊多猥瑣蓋一山一寺地本偏隅宗淨志已具梗概奎光必從而恢張之其冗沓宜矣

延壽寺紀略一卷

兩淮馬裕家藏本

明釋圓復撰圓復字休遠鄞縣人與屠隆同時延壽寺在鄞縣南三里舊號保恩院宋祥符間改爲延壽寺是書詳述知禮禪師本末及宋相會公亮置買莊田舊事他無所載蓋自備古刹之典故而已

禹門寺志六卷

兩江總督探進本

明戴英撰英字上慎宜興人崇禎甲戌進士禹門寺在宜興之龍池山是編前志山寺僧侶後紀碑銘序記詩文多

未雅馴

鄧尉聖恩寺志十八卷

江蘇周厚培家藏本

明周永年撰永年字安期吳江人鄧尉故有沈津志茲編乃踵而增之凡梵宇名釋序記語錄無不備載大約於寺之建置本末尤為詳悉故以聖恩寺志為名書成於崇禎十五年而中有康熙中碑刻及宋榮徐秉義詩文蓋後人所續入也

天童寺集二卷

兩淮馬裕家藏本

明楊明撰明不知何許人天童寺在鄞縣東六十里晉永康閻義興禪師居此山有童子來供薪水久之辭去自稱太白星因是山名太白寺名天童茲編敘述形勝綴以藝文前序無姓名疑即明所自作中稱撰為七卷今止兩卷似尚非完帙也

南溪書院志四卷

兩淮鹽政探進本

明葉廷祥郭以隆紀延譽陳翹卿同撰廷祥官九溪縣知縣以隆稱署縣事疑為丞簿之類延譽翹卿則九溪教諭訓導也其里貫均未詳南溪者朱子之父松作尉九溪實生朱子於其地理宗嘉熙初九溪令李修以時方崇尚道學人爭攀附遂於其地建二朱先生祠即書院所自昉也志中載書院額為帝昞德祐元年所賜而李韶所作記在嘉熙改元之歲已稱南溪書院則初建時已有此名但賜額在後耳其書僅紀書院之蹟所附詩文多不雅馴延譽之序以朱松朱子及宋理宗皆跳行別書使君臣相竝則欲尊朱子而不知所以尊悖謬甚矣

破山興福寺志四卷

兩淮馬裕家藏本

明程嘉燧撰嘉燧字孟陽休寧人崇禎末布衣明史文苑傳附載唐時升傳末常熟縣西北十里有破山其麓有寺

曰興福乃齊梁間所建是書一卷二卷記山中古蹟而詩文附焉三卷志建置四卷志禪宗序次雅潔爲山志中差善之本

靈隱寺志八卷 兩淮馬裕家藏本

國朝孫治撰徐增重編治字字台仁和人增字子能吳縣人其書因明萬歷中昌黎白珩之志稍增損之體例與他志略同惟以宦遊寄寓之人概收之人物一門則事涉創造於義未安

滄浪小志二卷 浙江巡撫採進本

國朝宋榮撰榮字牧仲號漫堂商邱人由廕生官至吏部尙書是編乃榮爲江蘇巡撫時得宋蘇舜欽滄浪亭舊址重爲修葺因蒐輯前人傳記詩文而附以所作記一篇詩一首及尤侗范承勳詩各一首共爲一集當時頗稱其好事然其所採多爲舜欽而作與亭無涉又南禪寺雖附近亭旁而實非當日之故址一概泛載亦未免稍失斷限矣

杏花村志十二卷 浙江巡撫採進本

國朝郎遂撰遂字趙客號西樵子池州人按杜牧之爲池陽守清明日出遊詩有借問酒家何處有牧童遙指杏花村句蓋泛言風景之詞猶之楊柳岸蘆荻洲耳必指一村以實之則活句反爲滯相矣然流俗相沿多喜附會古蹟以夸飾土風故遂居是村即以古今名勝建置及人物藝文集爲是編蓋亦志乘之結習也至於併郎氏族系亦附錄其中則併非志乘體矣

二樓小志四卷 浙江巡撫採進本

國朝程元愈撰汪越沈廷璐又補葺之與佟賦偉二樓紀略一書相爲表裏皆記寧國府南北樓事北樓卽謝朓之高齋南樓卽文昌臺明嘉靖中知府朱大器所建也賦偉書旁涉他事殊爲龐雜此輯錄歷代題詠并記南樓建造始末差爲有緒越有讀史記十表已著錄元愈字偕柳廷璐字元佩皆寧國人

青原志略十三卷 兩淮馬裕家藏本

國朝僧天然撰施閏章補輯天然始末未詳閏章字尙白號愚山宣城人順治己丑進士官至江西布政司參議
康熙己未 召試博學鴻詞授翰林院侍讀青原爲吉州名勝自唐行 思禪師開山說法以後遂爲巨剎至明王
守仁羅洪先歐陽德諸人於此講學故第三卷特立書院一門略記當時問對之語而其所採錄皆理之近於禪
宗者則緇流援儒入墨借以自張其教也

崇恩志略七卷 江西巡撫採進本

國朝僧智藏撰智藏字竺堂安福人崇恩寺在廬陵創自吳赤烏中屢經廢興康熙丙午智藏重修之 因輯是書
一卷山水道場及歷代住持上堂語錄二卷記疏三卷詩對聯四卷序五卷啟書六卷雜著法語七卷法產大旨
在張皇佛教以外護爲至榮體例蕪雜之甚

江心志十二卷 浙江巡撫採進本

國朝釋元奇撰江心寺在溫州府北永嘉江中卽謝靈運詩所謂亂流趨正絕孤嶼媚中川者也宋高宗嘗幸其
地稱爲名勝明釋成斌郡人王陽谷始創爲之志元奇因舊本重加編輯凡紀蹟一卷敕書一卷藝文八卷世系
雜記二卷

白鹿書院志十六卷 安徽巡撫採進本

國朝廖文英撰文英有正字通已著錄初唐李渤與其兄涉讀書廬山蓄一白鹿甚馴因名白鹿洞宋初置書院於
五老峯下朱子守南康軍援嶽麓書院例疏請敕額遂爲四大書院之一康熙中文英爲南康知府因卽舊志修輯
以成是書意求繁富頗失剪裁

靈谷寺志十六卷 兩江總督採進本

國朝吳雲撰雲號舫翁安福人靈谷寺在江寧鍾山之左明太祖遷梁寶誌塔於此改賜今名而號其山曰紫金舊
有景泰間僧潔菴嘉靖間黃河二志康熙庚辰雲重輯爲是編前有雲自序及寺僧叙曙所紀修輯緣起凡分二

十四類其門目皆因明志之舊僅略為刪補耳

白鹿書院志十九卷

安徽巡撫探進本

國朝毛德琦撰德琦有廬山志已著錄康熙甲午德琦為星子縣知縣因取廖文英原志重加訂正分類凡十曰形勝曰興復曰沿革曰先獻曰主洞曰學規曰書籍曰藝文曰祀典曰田賦形勝等七門皆因舊志興復主洞書籍三門則德琦所增也

通元觀志二卷

浙江巡撫探進本

國朝吳陳琰撰陳琰有春秋三傳同異考已著錄通元觀在錢塘縣宋紹興中劉鹿泉請於高宗建為修真之所嘉靖中美南始志之陳琰以姜志未備更為此書

孔宅志六卷

兩江總督探進本

國朝諸紹禹撰紹禹松江人青浦縣治之北地名孔宅舊有孔子廟相傳隋末孔子三十四代裔孫蘓州刺史禎僑寓於吳乃立家廟并葬先聖衣冠於此後漸湮廢明陸應陽重修之始述為孔廟記陳功又作續記康熙中紹禹增刪舊本以成是編案禎生於隋代不應尚存先聖衣冠即有之亦不應攜至吳中且隋時郡縣並無蘓州之名其說殊未可盡信也

丹霞洞天志十七卷

兩江總督探進本

國朝蕭韻撰韻字明彝南城人康熙中舉人明萬歷中建昌府知府邱齊雲嘗屬郡人左宗郢為麻姑山志久而版燬康熙中湖東道羅森復令韻增補成之首系以圖次列考表志記諸目而於題咏詞賦為尤詳

武林志餘三十二卷

浙江巡撫探進本

國朝張暘撰暘字東博號滌岑錢塘人是書搜輯武林諸名勝於道觀祠廟名賢古蹟紀載尤詳其末一卷附錄方物亦頗有考訂名志餘者欲以補前志所未備也然採摭頗富而體例未精往往失之冗雜所錄近人題詠亦殊少

別裁

東林書院志二十二卷 兩江總督探進本

國朝高崧高隆高廷珍高陞許獻同撰等四人皆高攀龍之裔獻亦攀龍同縣人也其書分建置院規會語祀典列傳公移文翰典守著述軼事十門意在博搜廣採而體例尤雜頗甚所附諸人又多牽附不特孫承澤濫廁其間即宋榮平生亦僅刻意於文章未嘗聞其講學也

增修雲林寺志八卷 浙江巡撫探進本

國朝厲鶚撰鶚有遼史拾遺已著錄是編成於乾隆甲子以靈隱舊志脫漏尚多且聖祖仁皇帝省方南幸駐蹕山中賜名雲林寺不宜仍用舊名故因前志而增輯之首紀宸恩次山水次禪祖次法語次檀越人物次

藝文詩詠而以遺事雜記終焉

宋東京考二十卷 浙江巡撫探進本

國朝周城撰城號石匏嘉興人是書前有雍正辛亥王璠序稱城客大梁三載隨境討蒐以成此書其凡例有云建隆以前東京非宋靖康而後宋不東京蓋專紀汴都一百七十年之遺蹟而作也每條皆援引舊書列其原文蓋仿朱彝尊日下舊聞之體然多引類書其博瞻殊不及彝尊又多載雜事務盈卷帙如所引宋稗類鈔二近侍爭辨貴賤由天一事因首有仁宗御便殿一語遂列之宮殿類中然則一代帝王何事不在宮殿內豈勝載乎他如造字臺吹臺繁臺卷中所引各書皆謂一臺而數名乃於繁臺則併入吹臺又別立造字臺名之類多彼此牴牾無所考證其精核亦不及彝尊也

鵝湖講學會編十二卷 江西巡撫探進本

國朝鄭之僑撰之僑字東里潮陽人乾隆丁巳進士官至寶慶府知府鵝湖為朱陸講學之所今其地屬鉛山之僑官鉛山知縣時因作是編首卷為之僑所作圖傳贊考二卷至八卷皆四賢問答諸書及學規條約講義九卷為之

僑及雷鏞所立條約十卷十一卷皆自宋迄今詩文之有關於鵝湖者而之僑所作亦並錄焉十二卷則之僑所作鵝湖書田志也書中大旨多調停朱陸之異同其意蓋欲附於講學然實則惟以書院為主故題詠名勝諸作亦皆收錄今仍附之地理類焉

右地理類古蹟之屬二十七部三百七十二卷皆附存目

豫章今古記一卷

浙江花縣杜家天一閣藏本

不著撰人名氏考隋書經籍志有雷次宗豫章記一卷宋王象之輿地碑記目又云次宗作豫章古今志是編首引次宗語末云次宗於元嘉六年撰豫章記則必非雷書觀所紀至唐而止有皇唐大唐之語似為唐人之作次書分郡記寶瑞記寺觀記鬼神記變化記神祠記山石記冢墓記翹俊記等九部記載寥寥絕無體例疑依託者雜鈔成之也

西湖繁勝錄一卷

永樂大典本

舊本題西湖老人撰不著名氏考書中所言蓋南宋人作也宋自和議既成之後不復留意於中原士大夫但知流連歌舞笑傲湖山故是書所述大抵嬉游之事以繁華靡麗相誇蓋亦耐得翁都城紀勝之類而瑣屑又甚焉

廬陽客記一卷

浙江汪汝璠家藏本

明楊循吉撰循吉有蘇州府纂修識略已著錄正德元年循吉同年進士西充馬金為廬州守請循吉修郡志以議不合歸後二年因採其風土大概述為此編凡十一目簡潔古峭頗有結構蓋借此以馳騁其筆力然漏略太甚不足以備考證也

蜀都雜鈔一卷

兩江總督採進本

明陸深撰深有南巡日錄已著錄此乃深為四川左布政使時所錄蜀中山川古蹟其論峨眉山當作峨眉又力辨禹生石紐為元和志之誤頗為有識其他亦多隨筆割記之文

閩部疏無卷數 兩江總督採進本

明王世懋撰世懋有却金傳已著錄是書記閩中諸郡風土歲時及山川鳥獸草木之屬亦地志之支流蓋世懋曾官福建提學副使記其身所閱歷者也

淞故述一卷兩淮鹽政採進本

明楊樞撰樞字運之自稱細林山人華亭人嘉靖戊子舉人官至江西臨江府同知是書乃所述松江一郡遺聞軼事以補志乘之闕略者松江本以吳淞江得名明初因地多水災故去水勿以讓之此書標目則猶仍其本名也書中於地理人物行誼藝能文字題詠以及詠諧瑣屑之事無不備載其藝文籍用宋孝王關東風俗傳例載陸續渾天圖以下凡百餘種悉其鄉人著作可為徵文考獻之資至於元楊維禎之名或從木或從示諸書參差不一樞以歲月求之謂字本從木入明後以諸王有諱楨者始改從示其言殊臆測無據又李至剛在永樂時以善於附會深蒙傾險之譏而樞信明一統志之虛詞反目以德量寬宏惜松江舊志略而不載亦未免步回護鄉曲之私也

秦錄一卷編修程晉芳家藏本

明沈思孝撰思孝字繼山嘉興人隆慶戊辰進士官至都察院右副都御史兼兵部侍郎事蹟具明史本傳是書多載陝西諸郡形勝風土開引經史諸書為證其論復河套事極以曾銑之議為非未免有所回護云

晉錄一卷編修程晉芳家藏本

明沈思孝撰所載多邊障形勝及防守扼要之處其田賦鹽課諸條與明會典亦略有同異至敘黃河所經州縣及太原晉祠則大抵習見之文無足以資考證

長溪瑣語一卷兩淮鹽政採進本

明謝肇淛撰肇淛有史臚已著錄長溪今之福寧府是書雜載山川名勝及人物故事閒及神怪蓋亦志乘之支流也

滇南雜記二卷 山東巡撫
採進本

明許伯衡撰伯衡號聽菴崑山人萬歷庚子舉人官晉寧州知州兼攝昆陽州事伯衡嘗輯晉寧志復雜採滇事為此書體例與輿記略同惟不列仕宦人物姓名坊巷公署之類及雜事各自標目為小異耳大抵略於古蹟而詳於時事故下卷自丁產以下所載公牘為最詳自序謂於滇事無損益而要為游談其大旨可見矣

西事瑣八卷 福建巡撫
採進本

明魏濬撰濬有易義古象通已著錄是書蓋其官粵西時所作一卷多言山川地理二卷多言風土三卷多言時政四卷五卷多言故事及人物六卷多言物產七卷多言仙釋神怪八卷多言制馭苗蠻之始末雖不立地志之名然核其編次固地志之類但不列門目耳其考訂頗不苟敘述亦為雅潔無說部沓雜之習然如載舒宏志轉生之類稍涉荒唐明惠帝程濟諸事亦相沿譌謬也

泉南雜志二卷 編修程晉
芳家藏本

明陳懋仁撰懋仁字無功嘉興人官泉州府經歷浙江通志稱其不以簿書廢鉛槧記泉南事多故牒所未備即是書也其所載山川古蹟禽魚花木以及郡縣事實頗為詳具中如淳化帖尼無著等一兩條亦稍有考證其官山一條破岡俗葬地之說持論亦正下卷則多記其在泉所施設之事皆得諸身歷者然如泉人之官嘉興及嘉興人之官泉者俱縷列姓名即簿尉亦並載之此非天下之通例懋仁以嘉興人而宦泉州故兩地互記耳使修地志者人皆援此例則罄南山之竹不足供其私載矣凡著一書先存一厚其鄉人之心皆至薄之見也

閩中考一卷 浙江吳玉
堉家藏本

明陳鳴鶴撰鳴鶴有東越文苑已著錄是書所考皆福州府境山川古迹稱得唐人閩中記於長樂農家得宋人三山志於徐焞參以聞見訂志乘之舛譌其考證舊事如東冶非東冶泉山非泉州清源山而越山冶山皆泉之支麓冶縣非東甌鑪峯石在南嶼不在旗山舊志本明新志誤刪其文因誤移其地亦頗精核惟後幅多採小說怪事及僧

家語錄未免傷於蕪雜

兩河觀風便覽四卷 江蘇巡撫採進本

不著撰人名氏中有稱萬歷二十年者而所列宗藩一門尚無福府則神宗中年之書也分十門一曰圖考二曰封域三日官秩四曰宗藩五日賦役雜差六曰戶口七日河防八曰驛傳九曰儲積十曰兵防大抵鈔撮案牘為之而於河南掌故一一具詳較地志諸書羅列山川侈陳人物濫載藝文者較為近實特其大者多見於史而小者亦備載於通志不免為已陳之故牘耳

增補武林舊事八卷 浙江巡撫採進本

明朱廷煥撰廷煥字中白單縣人崇禎甲戌進士官工部主事初宋末周密嘗錄南渡後百二十年典故及風俗游宴之盛為武林舊事廷煥於崇禎閒司權杭州復採西湖志鶴林玉露容齋隨筆輟耕錄及密所著癸辛雜志諸書補綴其闕以成是編密書十卷此增補反為八卷者密書別有一六卷之本廷煥據以推廣也自序謂增補數十則今案所增凡睿藻恩澤開鑪故都宮殿湖產災異六門共補一百五十四則與序不符殆序文字誤耶其中湖產一門既非宋代所獨有與斷限之例殊乖其災異一門亦非土俗民風朝章國典泛濫尤甚均非密著書之本意殊屬駢枝明人點竄古書多不解前人義例動輒破壞其體裁往往似此也

帝京景物略八卷 編修汪如藻家藏本

明劉侗于奕正同撰侗字同人麻城人崇禎甲戌進士官吳縣知縣奕正字司直宛平人崇禎中諸生是編詳載北京景物奕正摭求事迹而侗排纂成文以京師東西南北各分城內城外而西山及畿輔併載焉所列目凡一百二十有九每篇之末各繫以詩採摭頗疎王士禎池北偶談嘗譏其不考薩都拉集失載安祿山史思明所造雙塔事考據亦多不精確其為朱彝尊日下舊聞所駁正者尤不一而足其割裂藝元二字為塑工姓名一條殆足資笑噓又侗本楚人多染竟陵之習其文皆么茲側調惟以纖詭相矜至如太學石鼓一條舍石鼓而頌太學

殊傷冗濫又首善書院近在同時泛敘講學何關景物於體例亦頗有乖所附諸詩尤為猥雜方今奉 命重

輯日下舊聞考古證今務求傳信朱彝尊之所撰且為大略之推輪侗等弔詭之詞益可為覆瓿用矣

山左筆談一卷 編修程晉芳家藏本

舊本題明黃淳耀撰淳耀字蘊生號陶菴嘉定人崇禎癸未進士南都破後殉節死事蹟具明史儒林傳是編所紀

皆山東風土形勢山川古蹟及海運備倭諸事宜徵引拉雜殊鮮倫理案淳耀生平未嘗遊山東所著陶菴集內亦

無此書名此本見曹溶學海類編中疑亦出偽託也

楚書一卷 編修程晉芳家藏本

明陶晉樸撰晉樸字若樸秀水人崇禎間嘗侍親官楚因雜記湖南山水物產閒及古蹟然考證殊多疎漏如辨岫

嶺碑信楊慎所錄者為真本則其他可知矣

山東考古錄一卷 大學士英廉家藏本

舊本題 國朝顧炎武撰載吳震方說鈴中然說鈴載炎武書四種其二皆雜剽日知錄而此書之文獨日知錄

所不載末題辛丑臘望日庚申是日立春字蓋作於順治十八年考王士禎居易錄記炎武嘗預修 山東通志或

是時所遺稟本亦未可知也

京東考古錄一卷 大學士英廉家藏本

舊本題 國朝顧炎武撰載吳震方說鈴中其文皆見炎武所撰日知錄及昌平山水記殆震方勦取別行偽立

此名也

謫觚一卷 兩江總督採進本

國朝顧炎武撰時有樂安李煥章偽稱與炎武書駁正地理十事故炎武作是書以辨之其論孟嘗君之封於薛

及臨淄之非營邱諸條皆與地理之學有所補正

天府廣記四十四卷 編修闕守 謙家藏本

國朝孫承澤撰承澤有尚書集解已著錄是書以京畿事實分類編輯凡建置府治學宮城池宮殿各一卷壇廟四卷官署二十三卷其中倉場漕務附戶部選舉貢院附禮部之類又各以所屬繫錄人物二卷名勝川渠名蹟寺廟石刻陵園各一卷賦一卷詩三卷全用志乘之體承澤所作春明夢餘錄多記明事是編則上該歷代下迄於明為例稍殊其中如因工部而及修築遂併准黃形勢而詳述之則是南河而非北都因禮部而及儀注因併貴賤章服而縷載之則是會典而非地志且既以天府為名自應以地為限乃明建都在永樂時而內閣題名上溯洪武之初移石鼓入大都在元時而石鼓歌兼收韓愈章應物蘇軾鳳翔所作如斯之類皆務博貪多未免失之泛濫至於六科條下自載其奏疏名蹟類中自載其別業如斯之類亦未免明人自炫之習他如人物門成德傳末附載德殉難時與馬世奇書有在都縉紳盡如光含萬孫北海天下事向可為之語含萬即光時亨字以給事中從賊後為福王所誅者也以德之剛直明決與時亨承澤決非氣類未必有作是語如斯之類或不免有所依託李國禎降賊拷死具載諸書而以為棄城遁去賊追殺之如斯之類或不免傳聞失實前卷以翰林院為元光祿寺後卷又以翰林院為元鴻臚寺如斯之類或不免小有牴牾核其全書大抵瑕多而瑜少也

四州文獻摘鈔四卷 山西巡撫 採進本

國朝畢振姬撰其邑人司昌齡所摘鈔也振姬字亮四高平人順治丙戌進士官至廣西按察使山西通志稱其所著有四州文獻藏於家此本有司昌齡跋曰四州文獻蓋潞澤遼沁之通考也其間有懸揣附會之說前無總序條類紛雜蓋草創未就而其徒所鈔次凡二十五冊余以前人舊文各有原書又繁不能盡錄乃節其論著之要者與其所纂物產釐為四卷題曰四州文獻摘鈔據其所云則所存不及十之二尚龐雜如是則全書可以想見矣

歐江逸志一卷 大學士英 廉家藏本

國朝勞大輿撰大輿字宜齋石門人順治辛卯舉人官永嘉縣教諭是編前紀溫州舊事後記其山川物產大意欲

補郡乘之闕故命曰逸志然摺拾未富且皆不著所出未為精核至謂錢玉蓮為娼女更齊東之語矣

粵述一卷 大學士英廉家藏本

國朝閔敘撰敘號鶴瞿縣人太學題名碑作江都人疑其寄籍也順治乙未進士官至監察御史是編乃其督學廣西時所作敘述山川物產頗為雅潔其辨狄青取崑崙關一事核以地理足訂宋史之誤惟好穿鑿字義如謂猺字當作僮即說文之僮僮已為無理又謂猺人住屋作兩層人居其上豬圈牛欄皆在臥榻之下說文家字山下從豕可會此義云云尤為附會儒生喜談小學動稱六書為萬事之根本其弊往往至此也

星餘筆記一卷 山東巡撫採進本

國朝王鉞撰鉞有粵游日記已著錄此其世德堂遺書之第三種也皆其官西寧知縣時記其風土物產如蚺蛇狒狒諸條於舊說間有駁正所記柵字旭字澄字华字本字有字之類亦足補桂海虞衡志所遺然大抵地志所已載也以方為邑合故取巫馬期戴星之義名曰星餘云

中州雜俎三十五卷 河南巡撫採進本

國朝汪价撰价字介人號三儂外史自稱吳人其里居則未詳也順治己亥賈漢復為河南巡撫修通志价與其役踰年書成復採諸書所載軼聞瑣事關於中州者薈粹以成是編分天地人物四函天函子目五曰分野圖譜餘論雜識時令地函子目十六曰建都封國紀邑紀鄉紀山紀水紀室紀園紀寺紀塔紀觀紀廟紀墓紀碑紀橋紀俗人函子目二十一曰帝蹟聖蹟賢蹟官蹟文蹟武蹟忠蹟孝蹟義蹟節蹟隱流羽流縉流術流技流女史老史見史凶史異史人雜物函子目十四曰禽志獸志鱗志蟲志草譜木譜花譜穀品果品菜品飲案食案器考物考採摭繁富用力頗勤而多取稗官家言純為小說之體又事皆不著所出人亦往往不著時代編次繁複漫無體例可謂勞而鮮功者矣

湖壩雜記一卷 大學士英廉家藏本

大定四庫全書總目卷三十一

史部

地理類存目六

八

國朝陸次雲撰次雲字雲士錢塘人康熙初由拔貢生官江陰縣知縣是書蓋續田藝蘅西湖志餘而作如慶忌塔夾城之類亦頗有考辨而近於小說者十之七八蓋藝蘅之書體例亦如是也

姑孰備考八卷

安徽巡撫採進本

國朝夏之符撰之符字珪伯當塗人順治中修太平府志未成乃刪其八志二表而為此書首郡紀三卷以擬本紀次人物傳贊二卷以擬列傳次鄉音集三卷皆之符自作之詩非志非集殊乖體例又人物傳中列章茲佩於先賢而弦佩方序其書則其人未死亦豈蓋棺論定之義乎弦佩原序稱是書十二卷張總序又作九卷互相矛盾惟陶元鼎序作八卷與此本相合云

臺灣記略一卷

大學士英廉家藏本

國朝李麟光撰麟光號荅洲武進人是編雜記臺灣山川附以暹羅別記一篇篇帙寥寥疑為刪削不完之本也

海表奇觀八卷

浙江汪啟淑家藏本

不著撰人名氏凡標二十三門曰湖源曰疆境曰形勢曰分野曰氣候曰潮汐曰節序曰風俗曰黎俗曰占歷曰災祥曰名山曰水泉曰名宦曰人物曰列傳曰祠廟曰古蹟曰墳墓曰物產曰奇人曰奇事曰題咏蓋即鈔撮瓊州府志而每條附以論贊詩句據其自序稱戊申官於瓊州又言家於齊魯考瓊州府志康熙七年戊申知府牛天宿山東人當即此人也

江南星野辨一卷

兩江總督採進本

國朝葉燮撰燮字星期吳江人康熙庚戌進士官寶應縣知縣其書歷引周禮爾雅及星經史志所載揚州吳越分野獨推劉基清類天文分野之書為得郡邑分度之詳案星土之說雖本周禮保章氏亦見於左傳諸占然先儒已不得其傳解多附會術家用以推驗偶應者十不得一不應者十恒逾九况疆域既已非古而猶執二十八宿尺尺寸寸而拓之其乖迕殆不待辨輿圖所列大抵具文博引繁稱徒為枝贅而已